

Komisaun C PN ho Banku Sentrál Diskute Ona Atividade Petrolíferu

07/11/2018



Votasaun proposta governu iha debate espesialidade Orsamentu Jerál Estadu (OJE) 2018 iha uma fukun Parlamentu Nasionál. Imajen António Goncalves

DILI,(TATOLI) –Komisaun C Parlamentu Nasionál (PN) ne'ebé trata asuntu finansas, ohin (07/11) halo enkontru ho autoridade Banku Sentrál ho Tribunál Kontas, relaciona ho aliterasaun lei número 13/2005, kona ba atividade petrolíferu.

Prezidente Komisaun, Fernanda Lay, hateten proposta alterasaun lei número 13/2005 kona-ba atividade petrolífera molok altera, Komisaun C ho D Parlamentu Nasionál (PN) konsulta uluk Banku Sentrál ho Tribunál Kontas hafoin bele haruka ba sesaun plenária atu halo diskusaun.

“Ohin ami enkontru ho Tribunál Kontas hodi haree asuntu legalidade nian, no Banku Sentrál atu fó nia hanoin kona-ba alterasaun lei atividade petrolífera, karik orsamentu millaun U\$ 350 atu sosa asaun ConocoPhillips la tama iha OJE, maibé foti direita hosi Banku Sentrál hodi sai investimentu iha asaun ne'ebé atu sosa,” Fernanda Lay ba jornalista sira iha Parlamentu Nasionál, ohin.

Lay esplika katak kuandu ita hatama iha Orsamentu Jerál Estadu (OJE) significa ne'e despeza, maibé bainhira ita foti hosi Banku Sentrál significa hanesan investimentu, depois tinan lima ka neen ita sei hetan funan ka rendimentu balun hosi prosesu ne'e.

Iha fatin hanesan, Prezidente Komisaun D ne'ebé trata asuntu ekonomia no desenvolvimentu, Virginia Ana Belo reforsa lei atividade petrolífera ne'ebé atu halo alterasaun presiza rona hosi parte competente hafoin bele hakotu iha plenária.

Entretantu, iha proposta ba alterasaun lei ho possibilidade atu muda bainhira iha diskusaun jeneralidade ho espesialidade.

Jornalista : Zezito Silva

Editór : Manuel Pinto